


مکتبہ علمیہ

۱۹ نجی سنہ

سنہ ۱۳۱۷

جزوہ عدد : ۸۴





فعل اصطلاحی

و

(در) کلمه سی

جمله که مفید سوز دیکدره ایکی قسم اوله رق بریسی جمله اسمیه و دیگر ی جمله فعلیه در. جمله اسمیه: مبتدا، خبر ایله ادا خبر دن مرکب در. ادا خبر دیه خبرک مبتدایه ارتباطی افاده ایدن شیئه دینور، که مثبتلرده ادا خبر (در) و منفیلرده (دگدر) لفظ لریدر. مثلاً: الله رحیم در. دینلدر که (الله) مبتدا (رحیم) خبر (در) لفظی ادا خبر در. جمله فعلیه: فعل ایله فاعل دن تشکل ایدر. مثلاً: الله ایشلدکار مزی کور بر دینلدر که (الله) فاعل (کورر) فعل (ایشلدکار مزی) متعلقات فعل دن و یا مقدمات کلام دن اوله رق مفعول به در.

منطقیون ایسه کلام اخباری به، یعنی طرفین ایله آرملرنده کی نسبت تامه خبریه یی تضمن ایدن جمله به ایستر اسمیه اولسون، ایستر فعایه اولسون علی الاطلاق (قضیه) و قضیه ده محکوم علیه اولان طرفه، یعنی مبتدایه و یا مسند الیه (موضوع) و قضیه ده محکوم به اولان طرفه، یعنی خبره و یا مسنده (محمول) و محکوم علیه ایله محکوم به آرملرنده کی نسبت دال اولان لفظه ده (رابطه) اطلاق ایدر لر.

و برده (منطقیون لفظه مفردی اوج قسمه تقسیم ایدر که دیدیلر که: مفرد، اگر معنایه دلالتده مستقل اولیوب ده ترکیب الفاظه آلت اولورسه آکا (ادا) تعبیر اولور، که اهل عربیه نك: ده، دن گبی حروف معانی دیدکلرندن عبارتدر: مفرد معنایه دلالتده مستقل بولندیفی تقدیرجه اگر هیئت و صیغه سیله اوج زماندن برینه دلالت ایدر سه آکا (کلمه) دینور، که اهل عربیه نك (فعل) دیدکلریدر؛ اگر هیئته احد ازمنه به دلالت ایتمز سه (اسم) اطلاق اولور.

فعللر حاله ویا حدثه دلالت ایتدکدن بشقه هان کافه السنده تصریفات مخصوصه واسطه سیله دخی زمانه، فاعله، عدده، نسبته دلالت ایتدکلرندن افعالک محمول واقع اولدقلری قضیه لرده طرفینک ارتباطی افاده ایچون آیریمجه رابطیه حاجت یوقدر .
زید لگشدر، گله جکدر کبی جمله لرده (در) کلهسی ربط ایچون دگل، تأیید ربط ایچون ویا ماضی، نقلی بی ماضی، شهودی به تحویل ایچون زیاده قلور .

فعللر امور اربعه به دلالت ایدر دبدک: چونکه هر فعلده ایکی جزؤ تمیز اولنورکه بریسی مادی، دیگرى صوریدر. فرانسرلر برنجیسنه (Radical) جزؤ اصلی، دیگرینه (Terminaiasn) جزؤ اخیر دیرلر. جزؤ مادی اول جزؤ درکه فعل حال ویا حدثه اوجزئیه دلالت ایدر. فعلک بوجزئی اصلا تغیر ایتمز. (کیت) دن (کیدر) و (ایشله) دن (ایشلدى) و (قیل) دن (قیلدى) کبی بعضا جزؤ مادیده حروفجه (قلب) ویا املاخه زیاده ونقصان وقوعه گورسهده بوکبی تحولات، برتحول لفظی ویا رسمی اولوب هر حالده معنی جهته قطعاً تعلق و سرایتی یوقدر .

جزؤ صورتی تغیر ایدن جزؤ در . بو جزؤ عددجه، شخصجه، زمانجه، صیغه جه درت نوع تغیره معروضدر. عدد اودرکه مفرد ویا جمع بر فاعله نسبته فعل بوجزئیه دلالت ایدر. شخص اودرکه متکلم، مخاطب، غائب اوله رق بر فاعله نسبته فعل بوجزئیه دلالت ایدر. زمان اودرکه فعل افاده ایلدیگی شینک ماضی، حال، مضارع ویا مستقبل اولدیغنه بوجزئیه دلالت ایدر. صیغه دخی اول هیئتدرکه فعل حال ویا حدثی هانگی طرز و شکل ایله افاده ایلدیگنه بؤ هیئتی ایله دلالت ایلر. مثلاً: اوقودم، اوقوبورم، اوقورم، اوقوبه جم دینلده شؤ افعال جزؤ مادیلری اولان (اوقو) ایله (اوقومق) حدثه دلالت ایتدکدن بشقه (د) (بور) (ر) (حق) مواد صوریه سیله زمانه، (م) مادّه صوریه سیله عدد و شخصه نسبتلرینه و هیئت حاضره لرله دخی حدثک شکل و طرزینه دلالت ایدرلر .

ماضی، شهودینک مفرد مخاطبنده (ک) و مفرد غائبنده ضمیر مستتر اولان (او) و نفس متکلم مع الغیرنده (دق) یا خود (دک) و جمع مخاطبنده (کُر) و جمع غائبنده (لر) عدد و شخصه دلالت ایدرلر. ماضی، نقلی و مضارع و حال و مستقبلک مفرد

مخاطب‌لرنده (سك) و مفرد غائب‌لرنده ضمير مستتر بؤلان (ا) و نفس متكلم مع-
الغيرلرنده (ز) و جمع مخاطب‌لرنده (سكز) و جمع غائب‌لرنده (لر) اعداد و اشخاصه
دلالت ايدرلر .

(استطراد : ماضی' شهودیدن ماعدا افعالك مفرد مخاطب‌لرنی (سین) ایله
یازمه‌حق یرده (سك) ديه صاغر کافله یازمق مرجع کورونیور؛ چونکه صورت
ثانیه ایله رسم اولندقلری تقدیرجه کرک کندی جمع‌لری و کرک ماضی' شهودینک
مفرد مخاطب‌ایله املاجه یکدنسق اوله‌رق طرز رسم و نقشده بر آهنگ اطرادتشکیل
ایتمش اولورلر .

بعضاً مضارع صیغه‌لرنده (ر) حرف‌سدن اول (یاپ - یایار) ده اولدینی کبی
(ا) حرف املاسی و بعضاً (گل) دن مختلف فیه اوله‌رق (گلور) ده اولدینی کبی
(و) حرف املاسی گلور . اکثریا حالرده دخی (سو) دن (سویور) ده اولدینی
کبی حرف حالدن اول برحرف املا زیاده قلنور .

ایشته فعللر، غائب صیغه‌لرنده اولدینی اوزره یا حرف هیئت‌لریله (فاعل ما) یه
و متكلم ایله مخاطب صیغه‌لرنده اولدینی وجهله هیئتک تضمن ایلدیکی جزؤ معین ایله
فاعل معینه نسبته دلالت ايدرلر؟ یا خود فعللر علی الاطلاق (فاعل ما) یه نسبته
دلالت ایدوب آنجق متكلم و مخاطب صیغه‌لرنده اق (فاعل ما) برر جزؤ صوریه
تعین و تفسیر ایدلمشدر . شق ثانی به کوزه مثلاً : (اوقورم، اوقورسك) عباره‌لرنده
فعل اصطلاحی (اوقور) لفظی اولوب آنجق شؤ هیئتک متضمن اولدینی اسنادی
تعین ایچون اولکنده (م) ایکنجیده (سك) کتورلمشدر . شؤ حال اق ایکی عباردی
ایراد ایدن قائل گویا (اوقور) دیمسی اوزرینه کیم ديه تعین فاعله طالب اولان
سائله قارشو (بن، سن) ديه فاعلی تعین ایتمش اولیور، اما غائب صیغه‌لرنده تعین
فاعل مطلوب ایسه اسم ظاهر ایله تعین قلنیور، دگسه علی اصله مبهم اوله‌رق
براقلیور .

فعللرد، بؤ اسرار و نوا میسه مبنی درکه (ضرب) امثالی صیغه‌لر ایچون جزؤ
مادی و جزؤ صوری اوله‌رق صیغ مزبوده ماده‌لریله حدثه و صورت‌لریله نسبته واحد.

ازمنه دلالات ایدن الفاظ مفردند. و بویکی الفاظدن مقصود مجموع ماده و صورتک مجموع معنایه دلالاتی اولوب یوقسه جزئک جزؤ معنایه دلالاتی مقصود دگلدر دیمشلدرد. ینه بؤنک ایچوندرکه ائمہ عربیه: افعال حدثه و زمان ایله بین الائمہ مختلف فیہ اولهرق فاعل معین و یاخود فاعل مایه نسبتک مجموعنه موضوعدر دیدیلر، ینه بؤنک ایچوندرکه شیخ رئیس ابوعلی بن سینانک (شفاء) ده اولان تحقیقاتی جمله سندن اولدیفی اوزره منطقین: «قام زید» ائلنده (قام) کلمسی محمول اولهرق بنفسه و بلا واسطه، موضوع واقع اولان (زید) ه مرتبط اولدیغندن کلمه مزبوره ائلنده رابطه نفس محمولدر. «دیمشلدرد»

(زید زنگین ایدی، زید زنگین اولدی) امثالی تراکییده اولدیفی وجهله بعض افعال دها واردرکه آنلر یالکز طرفین ییئندهکی نسبتک ارتباطنه دال اولوب محمول اولمالار؛ و آنلره نحاة عرب افعال ناقصه و منطقین روابط زمانیه تسمیه ایدرلر. مع مافیہ (کجه اولدی، کوندوز اولدی) کبی ترکییلرده افعال تامه نلک احتوالیلدکلری معانی به دلالات ایلدکلرندن اوکبی تراکییده دیگر اشلری کبی محمول دخی اولورلر. حکیم شهر فارابی دیورکه: «فلسفه نلک لغت یونانیهدن عربیهیه حین نقلده قوم لغت عربیهده رابطه زمانیه بؤلندیغنی گورمشلردرکه اوده افعال ناقصه در. فقط فارسیده (است) و یونانیده (استی) مقامنه قائم اوله جق رابطه غیر زمانیه بؤلمدکلرندن (هو) (هی) کبی فی الاصل اداة اولیسوب اسم اولان لفظلری رابطه غیر زمانیه ایچون استعاره ایستیلر.»

کلمه اسملره: آنلر فی حد ذاتها حکم و اسناده دالات ایتمدکلرندن آنلرک تشکیل ایلدکلری جمله لرده طرفینک یکدیگرینه اولان نسبتلرینه ایجاباً و یا سلباً حکم ایتمک ایچون خارجدن رابطهیه احتیاج واردرکه اوده مبتدانک اسم ظاهر و یا ضمیر غائب بؤلیدیغنی جمله مثبتهلرده (در) و جهل منفیهده (دگلدر) اداتلیردر. سید جرجانی دیورکه: «(لیس هو) اداتنده (لیس) لفظی (هو) نلک دالات ایلدیگی نسبت ایجابیهنی رفع ایچون اولهرق ابکیسه نلک مجموعی نسبت سلبیهیه دال اولقله بؤنلرک مجموعی نسبت سلبیه ایلله محکوم بی محکوم علیه ربط ایدر.» مبتدانک اسم ظاهر

و یا ضمیر غائب اولمدینی دیگر جمله اسمیه ده کی روابط ایسه تصریف آئیده کوریله جگی اوزره ذکر یکن افعاله جزو صوری بولنان روابطک عینی در :

بن عثمانلی بم

سن عثمانلی سگ

(زید) یا خود (او) عثمانلی در

سز عثمانلی سگ

آنلر عثمانلی درلر

مقدمات مسروده دن شو خلاصه جیقورکه افعال. اجزاء صوریه لر بیله و یا هیئت صرف لر بیله ربط واسناده، یعنی حکم و تصدیقه دلالت ایدوب، اسمایسه معنای مذکور ه پی متضمن اولمدق لر ندن خارجدن علاوه اولنسان ادوة و روابط ایله یکدیگرینه ربط اولورلر. (در) کلمه سی دخی معنای محمولدن مجرد اوله ر ق صرف معنای اسناده دال بر اداه و رابطه دن عبارت اولوب لسانمزجه نه دلالة، نه اشتقاقاً افعال اصطلاحیه عدادنده دگدر. بوبر اداه اسنادکه اسملرده زمان معینه دلالت مقصود اولمدیغندن گویا ماضی شهود بیله مضارعک اداه زمانلری بولنان (د - ر) بر آرایه کتور بیلرک تشکیل اولنمشده مبتدالری اسم ظاهر و یا ضمیر غائب بولنان جمله اسمیه لرده، افعالک غائب صیغهلرنده مستتر ضمائر مهقابل اولمق اوزره طرفینی بر برینه ربط ایچون انتخاب قلمشدر .

واقعا فعللرده (فاعل ما) به نسبت ملاحظه سندن قطع نظر، موضوعلری متکلم و یا مخاطب ضمیرلری بولنان جمله اسمیه لرده رابطه لر :ینه موضوعلری بویله بولنان جمله فعلیه لرده کی رابطه لرک عینی ایسه ده حسن و طبعه متک شهاداتی وجهله بۇ رابطه لر فعللرده جزو صوری اوله جق درجه ده ملحق به لر بیله امتزاج ایلش اولدقلری خالده اسملرده بو حالی اکتساب ایتمامشدرلر. خلاصه الخلاصه شویله کورینور، که اسملرده نه فاعل معینه، نه فاعل مایه نسبت به دلالت مفقود اوله ر ق قطعاً اسنادی متضمن بولنمدقلری جهته غائبلرده طرفین جمله یی یکدیگرینه ربط ایچون (در) لفظی، وصیغ سارمده دخی افعالک جزو صوری الحاق ایدلش و بونلرده

جمله اسمیه ده اداة خبر، اداة اسناد، رابطه کی اسم و یریلوب فعل اطلاق اولمیشدر.
 ترك حرف واصطلاح ایدرك (در) اداتنه (فعل) ديه جك اولور سسق :
 گمشدر، گله جكدرك کی ترکیلری فصل تأویل ایدر جگز . سلیمان دده نك مولد
 منظومه سنده کی شؤ بیتنی :

هرنه درلو کیم سعادت وار درر

بخشی خوی کرکلی عادت وار درر

نصل تحلیل ایله جگز ؟

واقعا فرانسز جمله (est) لفظی (verpoe) فعل عد اولنهرق صرفیون
 و منطقییونی جمله ویا قضیه یی بر حکمی احتوا ایدن سوزدر؛ ديه تصریف ایتدکن -
 صکره « قضیه ویا جمله الك ساده تشکلنده ایکی طرف ایله آنلر بیننده کی رابطه یی
 احتوا ایدر : مسند ایله، موضوع ، یاخود توصیف اولنحق ایستیلان شی؛ مسند
 محمول، یاخود موضوع، حمل اولنان وصف؛ فعل که موضوع ایله محمول آره سنده کی
 نسبتک ایجاباً ویا سلباً حکم و تصدیقی افاده ایدر « دیورلر .

J'aperçus un vieillard vénérable

بریر محترم گوردم

جمله سنی (Je fus apercevant) تقدیرنده قلدقدن صکره (Je) موضوع (fus)

فعل (apercevant) دخی متعلقیه برابر محمولدر دیورلر .

Grammaire générale نام رساله ده شوبله یازیلی در :

« افکار مزك باشلیجه فعل و عملی اولان اسناد و تصدیقی افاده ایدن کلماتی ایجاد
 انسانلرك احتیاجی، مبانی افکار مزی افاده ایدن کلماتی ایجاد اولان احتیاجلرندن
 کبرو قالماز . »

ایشته شؤ (فعل) تسمیه قلنان شی، او اولکی احتیاجی ایفا ایدن شیدن عبارتدر؛
 چونکه فعلک اصل استیمالی تصدیقه دلالت ایتکدر ، یعنی بؤکله نك بؤلندیفی سوز
 یالکز اشیایی تصوّر سازج ایله تصوّر ایدن کیمسه نك سوزی اولیوب بلکه او اشیا

آرہ سندہ کی نسبتی تصدیق ایدن کیمسہ نٹ سوزی اؤلدیغنی افادہ ایتمکدر؛ بوجہ تہلہ درکہ (مصدق) کبی تصدیق افادہ ایدن بعض اسملردن فعل تمایز ایدر، چونکہ بؤکبی اسملرک تصدیق افادہ ایتملری عقلک برانعکاسیلہ مجرّد مبنای فکر من بؤلنملری حسبیلہ در؛ و بناءً علیہ کلمہ مزبورہ امثالی اسماء مجرّد تصدیقی بر تصویر سازج ایلہ تصویر ایدن کیمسہ یہ دلالت ایدوب، یوقسہ تصدیق اسنادی بی استعمال ایدنہ دلالت ایتمز: مثلاً (زید تصدیق ایدر) دینلکدہ (تصدیق ایدر) دیمک (تصدیق ایدیچی در) دیمہ نٹ عینی در، و شؤ حالده (در) لفظی زیدہ متعلق، ایدیلان حکم و تصدیق؛ و (تصدیق ایدیچی) لفظی ده تصویر سازج ایلہ تصویر اولنوبده زیدہ حل اولنان تصدیقی افادہ ایدر.

فعلک اصل استمالی تصدیق افادہ ایتمک ایدی دیورم، چونکہ آشاغیدہ گوسترمہ جگزرکہ آرزولہ مک، یالوارمق، بیورمق و سارمده اؤلدیغنی اوزرہ فعل روحزک دیگر حرکاتی افادہ ایچون دخی استعمال اولسور. لکن بؤ آنجق تصریف و صیغہ تغیر ایدملکلہ اولور، و بناءً علیہ بتون بوبایدہ فعلہ صیغہ اخباریہ سندہ اؤلدیغنی اوزرہ آنجق معنای اصلیی اعتباریلہ نظر ایدہ جگزر. بواعبارہ کورہ دینہ بیلورکہ فعلک فی حدّ ذاته استمالی طرفین جملہ نٹ ذہنمزده ایقاع ایلدیگمز ارتباط و اتحادی افادہ ایتمکدن بشقہ برشی ایچون دگلدر؛ لکن فعل جوهری تسمیہ قلنسان (être) فعلندن بشقہ بر فعل یوقدرکہ بؤ سادہ لگندہ قالمش اولسون، بؤده بالخاصہ صیغہ حالک اوجچی شخص مفرد غایب بولنسان (est) ده و بعض احوالده در؛ چونکہ انسانلر افادہ لرینی اختصارہ بالطبع مائل بولندقلرندن آنلر هان دائماً برتک کلمہ ده تصدیق واسنادہ دیگر مفاهیمی ده علاوہ ایدرلر.

۱ نجی، آنلر تصدیقہ بر معنای وصفی علاوہ ایدرلر، شویلہ کہ اوحالده ایکی کلمہ بر جملہ تشکیل ایدر: زید یشایور. ده اؤلدیغنی کبی، زیرا (یا شایور) کلمسی یالکزجہ تصدیق و برده یشایچی اولمق وصفی احتوا ایدر؛ و بناءً علیہ (زید یشایور) دیمک (زید یشایچی در) دیمک برشی اولوب آرہ لرندہ برفرق یوقدر. هرلساندن افعالک تنوع عظیمی بوندن نشأت ایدر. حالہو کہ فعلہ (تصدیق) مفہوم عامی

ویرمکه اکتفا اؤلنوبده آکا هیچ بر وصف خصوص علاوه قلمیه جق اولهیدی،
هیچ برلسانده برتک فملدن بشقهسنه احتیاج قالمیه جقدی. که اوتک فعلده فعل جوهری
تسمیه قلنان فعلدر .

۲ نجی، بعض احوالده جمله نك مبتداسنی ده علاوه ایدرلر، شویله که احوالده
ایکی کله وحتی برکله بیله بر جمله کاملهینی تشکیل ایدر: ایکی کله (sum homo)
دینلدیگی وقتنده اولدینی کی؛ زیرا (sum) لفظی یالکز تصدیق افاده ایتیموب
(بن) ضمیرینك معناسنی دخی تضمن ایدر، که بوجه نك مبتداسی اودر، و بو ترکیب
دائما فرانسهجه (je suis homme) جمله سنك معناسنی افاده ایدر . نك برکله
(sedeo) دینلدیگی وقتنده اولدینی کی؛ زیرا بوفعل، آنفا دیدیگمز وجهله فی حدته
ذاته تصدیق و معنای وصفی تضمن ایلدیگی کی، برنجی شخص ایله متکلم وحده ایله
قام اولدیغندن مبتدایی ده تضمن ایدر که (je suis assis) معناسنه اولور . بتون
افعالده معناد اولان اختلاف اشخاص بوندن گلور .

۳ نجی، تصدیق وقوع بولدینی زمانه نسبت دخی فعللره علاوه اولور؛
شویله که (اوقودك) دیدیگم وقت بؤرتك کله مخاطبه (اوقومق) حدتی زمان حالده
دگل، بلکه ماضیده اسناد و تصدیق ایتدیگی افاده ایدر، و بر معناد بتون افعاله
شامل اولان اختلاف ازمنه دخی بوندن گلور .

برتك کلمیه ربط اولنان شو معانی مختلفه، يك مدقق اولانلر مستثنا اوله رق
يك جوق کیمسه لری ماهیت فعلی حسن تشخیصدن منع ایتمشدر، زیرا آنلر فعله
مفهوم ذاتیسی بولنان تصدیق اعتبار یله نظر ایتدیلر، بلکه فعل اولمق ملابسسه یله
آنك عوارضدن بولنان شو دیگر نسبتلره کوره نظر ایتدیلر .

ایشته ارسطو، فعلده ذاتی اولان مفهومه ملحق معاینك اوچنجیسنه حصر نظر
ایدهرك فعلی: « برکله در که زمان ایله افاده ایدر . » دیه تعریف ایتدی .

مشاهیر صرفیوندن (Buxtorf) کی دیگر لری آکا اوچنجی معنایی علاوه
ایدهرك فعلی: « برکله در که ازمنه و اشخاص ایله تصریفات مختلفه سی واردر . » دیه
تعریف ایتدیلر .

دها بشقه‌لری ده بومعانی، منضمه‌نک برنجیسی اولان معنای محموله حصر نظر ایدمرك و انسانلرك برتک کلمده تصدیقه علاوه ایتدکاری محمولات علی‌العاده افعال و انفعالاتر ديه ملاحظه ایلیمرك حقیقت فعل حدثلری و یا انفعاللری افاده ایلکین عبارتدر صانیدلر .

نهایت مشهور اسقالیجر Scaliger (لاتین لساننک قواعدی) نام کتابنده برسر بولمش زعمیه اوده دیمشدرکه: «اسما استمراری، یعنی باقی اولان شیئی افادهیه و فعللر حدوث و تجدیدی، یعنی زائل اولان شیئی افادهیه موضوع اولدقلرندن، اسملر ایله فعللر آرد-سنی تمیز ایتکلیک منشأ حقیقیسی اشیان باقی اولانلره زوال-ب-زیر اولانلری یکدیگرندن تفریق ایتک ایدی .»

لکن بالسهوله گوریلورکه بتون بوتعریفلر باطل اولوب هیچ بریسی فعلک ماهیت حقیقیه‌سی ایچون قول شارح اوله‌ماز .

ایلك ایکی تعریفک بطلانی ارابه طرز افاده‌لری کفایت ایدر، چونکه بوایکی تعریف فعلک نهیه دلالت ایتدیگنی سویه‌میور، یالکیز نه ایله دلالت ایلدیگنی سویه‌میور .

صکره‌کی ایکی تعریف ایسه ده باطل؛ زیرا آنلرده برتعریفک اڭ بیوک نقاء نصندن اوله‌رق ایکی نقیصه وارد، که اوده تعریف معرفک کافئه افرادینه و یالکیز افرادینه صادق اولماسی، یعنی تعریف مطرد و منعکس و تعبیر دیگرله جامع و مانع بولماسی کیفیتلریدر .

زیرا بعض فعللر واردرکه نه افعاله، نه انفعاله، نه زائل اولان شیئه دلالت ایدرلر؛ ایس، یجب، یمتتع، یستحیل، یمكن و امثالی گبی .

و برطاقم کلمات ده واردرکه فعل اولدقلری حالده افعال و انفعالاته و حتی اشیای-زائلیه بیله دلالت ایلدکلرندن (اسقالیجر) اڭ تعریفته گوزه آنلرده داخل تعریف اولمش اولورلر؛ زیرا محققدرکه اسم فاعل و مفعوللر اسماء حقیقه‌دندرلر، و حالبوکه افعال متعدیه معلومه اسم فاعللرینک افعاله و افعال مجهوله اسم مفعوللرینک انفعاله-لانه دلائلری مشتق اولدقلری فعللرینک یکیدن آشاغی قالماز؛ و (آقان) لفظنک

برشی زائله (آقار) لفظی قدر دلالت ایتدیگنی ادعا ایتک دخی هیچ برحق و سنده مستند دگدر .

ایلك ایکی تعریفک عامینه اوله رق بوکا شؤده علاوه اولنه بیلور. که اسم فاعل و مفعوللرده زمانه مقارن اوله رق افاده مضی ایدر لر، چونکه آنلرکده حاللری، ماضیلری، مستقبللری واردر، خصوصیه الینوز لساننده ...

شؤ حالده، بر اسم فاعل نیچون بر فعل اوله میور، بؤنک اصل سببی آنک افاده. تصدیق ایتامه سیدر : بوندن نشأت ایدور که اسم فاعله بر فعل علاوه ایتدکجه، یعنی فعل اسم فاعله تحویل ایدیلرک کندیسندن رفع و ازاله ایدلمش اولان شی تکرار کتورلدکجه بر جمله تشکیل ایده مز + و کندیسنه (در) علاوه سیله (زید یشایان در) دیمز سه کتر (زید یشایان) بر جمله دگدر، بونه ایچون؟ چونکه (یشایور) ده مندرج اولان تصدیق، آندن (یشایان) اسم فاعلنی یایمق ایچون رفع ایدیلدیورده آنک ایچون؛ اگر سببی بو اولمیهیدی نه ایچون (زید یشایور) بر جمله اولسونده (زید یشایان) . (در) علاوه ایدرک (زید یشایاندر) دیمدکجه بو بر جمله اولسون ؟ بوندن ظاهر اولور که برکلمنی فعل ابدن و یا ایتیان شی اوکله ناک تصدیق متضمن بولنوب بولنمیه سیدر ...

بنابراین، فعلده یالکتر ذاتی اولان شیئی ساده جه ملاحظه ایله، آنک یکانه تعریف صحیحی : (برکلمدر که تصدیق افاده ایدر) اولدیغنده ثبات و اصرار ایتلی در : زیرا هیچ برکله بولنه ماز که تصدیقه دلالت ایتسونده فعل اولسون، و هیچ بر فعل کوریهله - مز که هیچ اولماز سه صیغه اخبارده افاده تصدیقه خادم بولنسون. و بر فعل ایجاد ایدلمش اولایدی (نته کیم (est) کلمه سی اوله جقدر) که نه شخصاً، نه زماناً هیچ بر - اختلاف اولمق سزین علی الدوام تصدیقه دلالت ایتسونده اختلاف اشخاص یالکتر اسما و ضمائر ایله و اختلاف ازمه (ظروف) ایله افاده اولسون. بو فعل شهه مز بر فعل صحیح اولمقدن گپرو قالمیه جقدی. نته کیم فلاسفه ناک (جناب حق سمرمدی در، هر جسم قابل تجزئی در، کل جز و نیدن اعظم در) کبی بدیهیه دائمیه تسمیه ایتدکلری قضایاده فی الحقیقه (در) کلمه سی یالکتر تصدیق افاده ایدر، هیچ بر زمانه نسبتی یوقدر، زیرا

بوقضایا هر زمانه گوره صحیح در ، و بو قضایاده عقابر هیچ بر اختلاف شخصی حصر نظر ایتمز .

لهذا فعل، کنیدیسنده ذاتی اولان شیئه نظرآ، برکله در که تصدیق افاده ایدر؛ مع مافیه فعلک تعریفه باشلیجه عوارض علاوه ایدلمک آرزو ایدیلورسه بوجه آتی تعریف اولنه بیلور : برکله در که شخصی، عدده، زمانه اشارت ایله تصدیقی افاده ایدر. بو تعریف ایسه خاصه فعل جوهری یه صادق اولور .

زیرا افعال سائرک متضمن اولدقلری تصدیقی انسانلر بعض اوصافله مزج و توحید ایلدکلری جهتله آنلر فعل جوهریدن تخلف ایلدکلرندن آنلر شویله تعریف اولنه بیلورلر : برکله در که شخصی، عدده، زمانه اشارت ایله بروصفک تصدیقته دلالت ایدر ... »

لکن بزده (در) کلمه سنک فعل اولدینی نه اشتقاقاً، نه ده فعله مخصوص خواص و آثار ایله ثابت در . ثابت اولمدقدن بشقه، بو ملاحظه ایله نظر اولدینی تقدیرجه (گیشدر، کیده جکدر) کبی برلرده ایکی فعل بری اوزرینه یغلش اوله جفته کوره بو ملاحظه نك عدم موافقتی نمایان اولسنه مبنی، مدلوله مطابق بولنان (اداة اسناد، اداة خبر، رابطه) تعبیرات مألوفه فی ترک ایله کله مزبور مبنی افعال اصطلاحیه عدادینه صوقده قطعا محسنات کوریه میور. (بولوحه کوزل در) جمله - سنده (در) نه ایسه (بولوحه کوزل دگل) جمله سنده ده (دگل) اودر، شؤ حالده آگاهده می (فعل) دیه جگز ؟ دیه جک اولورسه ق، هانگی اشتقاق، هانگی حجت بزده استنادگاه اوله جقدر ؟ آنلره اداة و رابطه دیرسه ک (دگلدر) کبی ملتقارینی تأسیسه حل ایدرز، فقط فعل دیرسه ک نه دیلم ؟

درسمات استیناف محکمه بی اعضاسندن

حق

